



Arkivnr: 2014/15615-2

Saksbehandlar: Stig Aasland

Saksframlegg

Saksgang

Utval	Saknr.	Møtedato
Opplærings- og helseutvalet		20.01.2015
Kultur- og ressursutvalet		22.01.2015

Vidareføring av ordninga med opne gymsalar

Samandrag

Fylkesutvalet løyvde 23.02.12 kr 200 000 til eit prøveprosjekt med utlån av fylkeskommunale gymsalar til idrettslag som driv med aktivitetar retta mot barn og unge. Utlånet skulle ikkje gå utover skulen sine ordinære aktivitetar, verken med tanke på romkapasitet eller budsjett. Midlane skulle nyttast til reinhald og vakthald slik at skulen ikkje fekk meirkostnader. Fordelinga av gratis utlån av gymsalar vart gjort i samråd med Hordaland idrettskrets.

Prøveprosjektet vart gjennomført i skuleåret 2012/13 og vidareført til skuleåret 2013/14. I Fylkesutvalet sitt møte 31.10.2013 vart prosjektet vidareført og utvida ut hausten 2014. I desember 2014 vart det utført ei ny evaluering av tiltaket.

Etter ei evaluering av skular, idrettslag og Hordaland idrettskrets har det kome fram at ordninga har gjeve fleire barneidrettar ein sårt tiltrengt treningsstad. Hordaland idrettskrets og fleire av skulane er særst nøgd med prosjektet og ønskjer at ordninga blir vidareført, og at den blir utvida til fleire idrettar og fleire skular i fylket for å få ei betre geografisk spreiding.

Forslag til vedtak

Opplærings- og helseutvalet ønskjer å vidareføra og utvida prosjektet til ei fast ordning. Ordninga med opne gymsalar til idrettslaga sine aktivitetar retta mot barn og unge held fram i 2015 som budsjettert, og blir utvida til ei årleg ramme på kr 400 000 frå og med 2016.

Rune Haugsdal
fylkesrådmann

Svein Heggheim
fylkesdirektør opplæring

Saksframlegget er godkjent elektronisk og har derfor inga underskrift.
Fylkesrådmannen, 18.12.2014

Bakgrunn

Prosjektet starta skuleåret 2012/13 og hadde som formål å la lokale idrettslag få tilgang til fylkeskommunale gymsalar på kveldstid, dersom skulen ikkje hadde andre aktivitetar. Opplæringsavdelinga og Hordaland idrettskrets hadde synfaring på alle dei vidaregåande skulane med gymsal for å kartlegga om dei var eigna til dette føremålet. Eit vesentleg poeng var at skulen ikkje skulle ha meirutgifter dersom dei var med i prosjektet, og dei fekk såleis økonomisk kompensasjon for vask og vakthald. Midlane blei overført til Hordaland idrettskrets som betalte ut til den einskilde skule.

I løpet av perioden har Garnes vgs, Fana gymnas, Langhaugen vgs, Tanks vgs og Årstad vgs delteke i prosjektet. Det er Hordaland idrettskrets som, ut frå behov hos dei ulike idrettslaga, har fordelt treningstid på dei ulike gymsalane. På fleire skular utanfor Bergen hadde lokalidretten allereie avtalt aktivitetstid i skulane sine gymsalar, eller så hadde skulen ikkje kapasitet. I tillegg var behovet for ledige treningslokale størst i Bergen. Dette er bakgrunnen for at det i prosjektet sine to første år berre har vore med skular i Bergensregionen.

Perioden 2013/14, samt hausten 2014.

I inneverande periode er det Årstad vgs, Langhaugen vgs, Fana gymnas og Garnes vgs som har hatt ledige gymsalar på kveldstid. Det er eit variert sett med idrettar som har fått tildelt treningstid, mellom anna Bergen turnforening, Kråkenes idrettslag, Arna-Bjørnar fotballklubb, Cheerleading, Bergen karate- og kampsportklubb og fleire andre.

Evaluering.

Etter den første perioden (2012/13) var over, vart det i samband med idrettslaga, Hordaland idrettskrets og dei aktuelle skulane utført ei evaluering av prosjektet. Her kom det fram at idrettslaga var særstis nøgde med prosjektet, og at dei var glade for å kunne nytta dei opne gymsalane. Prosjektet hadde gjort at fleire born hadde kome i aktivitet, og at det soleis var eit viktig tiltak i eit folkehelseperspektiv. Alt i alt var dei ulike partane godt nøgde med prosjektet, som har ført til at færre fylkeskommunale gymsalar står tomme på kveldstid.

Hausten 2014 vart det utført ei ny evaluering. Representantar frå idrettslaga, skulane og Idrettsrådet i Bergen kom med tilbakemeldingar om ordninga. Årets evaluering gav like gode tilbakemeldingar. Alle idrettslaga var særstis nøgde med ordninga, som har ført til at fleire born og unge får treningstid i lokalmiljøet. Fleire lag melder om at dei måtte ha avslutta treningstilbodet for born dersom dei ikkje hadde vore med på ordninga, sidan fleire treningslokale har vorte stengt i det siste (til dømes Sentralbadet og Natland skole). Nokre skular og idrettslag har forbedringspotensiale når det gjeld gode kontrollrutinar og system på nøkkelutlevering og oversikt over kontaktpersonar, men generelt blir det meldt om god kommunikasjon mellom skulane og idrettslaga. Det er ingen tilbakemeldingar om at ordninga går ut over skulen sine eigne aktivitetar.

Vegen vidare

Det er ønskjeleg at tiltaka med opne gymsalar for barneidretten blir ei permanent ordning. Med ei fast budsjettramme kan barne- og ungdomsidretten i større grad ha ei føreseieleg planlegging av den lokale idretten. Det er god samfunnsøkonomi og viktig folkehelsearbeid i det å nytta tomme gymsalar til fysisk aktivitet for barn og ungdom, og det gjev samstundes deltakarane ei forankring i nærmiljøet og eit sunt fritidstilbod.

Hordaland Idrettskrets har best kjennskap til kva lokallag som treng treningslokale og korleis det er best å arrangera dette. Såleis er det mest tenleg å vidareføra ordninga med at Hordaland Idrettskrets i samarbeid med HFK står for sjølve fordelinga og val av ledige gymsalar. Med ein auke i budsjettet i 2016 vil ordninga kunna bli utvida til andre deler av fylket, og såleis bli ei ordning som hjelper barne- og ungdomsidretten i heile Hordaland.